

# **Titus Brandsma**

## Carmelita no Martir

### BIOGRAFIA BADAK

Anno Brandsma moris iha rai-Olanda nia provinsia ida naran Friesland iha 1881. Nia sai membru Orden Carmelita iha 1898 no foti nia aman nia naran, Titus, nu'udar ninia naran relijiozu. Nia halo Profesaun Primeiru iha fulan Outobru 1899 no ordena nu'udar padre iha loron 17 Juñu 1905. Nu'udar ema akadémiku ida, Titus nia área espesialista mak filozofia no misticismo. Nia ajuda estabelese Universidade Katóliku Nijmegan iha 1923, depois kaer papel nu'udar Reitor Magnífico.

Iha tinan sira antes Segunda Guerra Mundial, Titus hato'o kritika públiku kona-ba ideolojia Nazi nian. Durante okupasaun Olanda, nia defende liberdade de imprensa, liu-liu imprensa Katóliku nian. Titus mak kaptura tiha iha fulan Janeiru 1942 no haruka ba Campo de Concentração Dachau, iha ne'ebé sira oho nia liuhusi uza injesaun letal iha loron 26 Jullu 1942. Nia beatifikadu iha 1985. Titus sei kanonizadu nu'udar martir iha loron 15 Maiu 2022.



### Moris Uluk

Anno Brandsma mak oan ba Tjitsje no Titus Brandsma, ne'ebé moris iha loron 23 Feveiru 1881 iha Wonseradeel iha Friesland, provinsia ida iha rai-Olanda nia parte norte. Familia Brandsma konsiste oan feto na'in haat no oan mane na'in rua, no Titus mak segundu mais novo. Oan hamutuk na'in lima mak ikus liu tama ba moris relijiozu nian.

Familia ne'e mak agrikultór-na'in no iha rai ho karau-inan. Sira fa'an karau nia susu-been no keiju ne'ebé sira halo rasik. Iha tempu ne'ebá, Katóliku-oan sira mak minoridade iha Friesland no sira proteje sira-nia relijiaun no kultura. Anno nia aman servisu atu konserva Friesian nia kultura iha familia nia laran no komunidade lokál nia laran. Nia partisipa iha politiku, no iha momentu ida nia kaer papel nu'udar xefe ba konsellu eleisaun lokál.

Bainhira Anno remata ninia edukasaun sekundáriu iha eskola Fransiskanu, nia deside atu tama ba Orden Carmelita. Nia komesa ninia novisiadu iha Boxmeer iha fulan Setembru 1898,



no foti ninia aman nia naran, Titus, nu'udar nia naran relijiozu. Nia halo Profesaun Primeiru iha fulan Outobru 1899 no ordena nu'udar padre ida iha loron 17 Juñu 1905.

Hafoin halo tan estudu iha Universidade Gregoriana iha Roma, nia simu Doutór de Filosofia iha 1909. Titus iha mos interesse forte kona-ba Espiritualidade no Jornalizmu, área rua ne'ebé sai hanesan ninia servisu boot iha nia moris, hamutuk mós ho servisu akadémiku.

### Ministériu no Misaun

Iha 1923, Titus ajuda estabelese Universidade Katóliku Nijmegen, no servisu iha ne'ebá nu'udar dosente, profesór no administradór. Nia kaer papel nu'udar Reitor Magnífico (Presidente) durante tinan akademiku 1932-33.

Nu'udar irmaun Carmelita, nia mós gosta atu fahe Orden nia tradisaun espiritual ho ema seluk ne'ebé la'ós iha Universidade laran. Nia la'o ba fatin oioin hodi hato'o hanorin kona-ba Espiritualidade Carmelita. Bainhira prepara ba viajen hanorin ida ba Estadus Unidas iha 1953, nia hela durante periodu balu iha Carmelita nia Komunidade sira iha Whitefriar Street, Dublin, nomós iha Kinsale, Co. Cork, Ireland.

### Jornalizmu

Titus mós dezenvolve ninia interesse iha área jornalizmu no publikasaun. Iha tinan 1935 nia rohan, nia sai Konselleiru Espiritual Nasional ba Sindikatu Jornalista Katóliku. Iha papel ida-



ne'e, nia enkoraja opozisaun ba publikasaun propaganda Nazi nian iha jornál Katóliku sira nomós iha imprensa en jerál. Nia kritiku liu kona-ba propaganda nia sentimentu anti-semitismo. Bainhira Nazi sira halo invasaun ba rai-Olanda iha fulan Maiu 1940, Titus mak konselleiru ba Arsebispu iha Utrecht. Nia enkoraja Bispu sira atu ko'alía kontra persegisaun ema Judeu sira no violasaun direitus umanus en jerál ne'ebé okupante sira halo. Liuhusi halo nune'e, nia sai ema ida ne'ebé autoridade sira buka tuir.

## Kapturasaun no Sai Martir

Jornál Katóliku sira lakohi imprime propaganda Nazi nian no ida-ne'e mak determina Titus nia destinu. Titus konkorda atu nia rasik sei lori karta ida husi Bispu Katóliku sira ba editór ida-idak. Karta ida-ne'e fo instrusaun ba editór sira atu labele kumpre ho lei foun ne'ebé obriga sira atu imprime promosaun no artikel ofisial husi Nazi sira. Titus vizita tiha editór hamutuk sanulu-resin-haat hafoin Gestapo sira kaer nia iha Nijmegen iha loron 19 Janeiru 1942.

Titus mak detein iha Scheveningen no Amersfoort iha rai-Olanda antes lori ba Dachau iha fulan Juñu. Tanba rejime iha ne'ebé mak severu loos, ninia saúde sai ladi'ak lalais no nia tama ba akampamentu nia ospitál iha semana terseiru iha fulan Jullu. Nia submete ba esperimentasaun biolójiku hafoin hetan oho liuhusi injestau letal iha loron 26 Jullu 1942. Iha loron ne'ebé nia mate, Bispu Olanda sira fo sai karta pastorál ida ne'ebé hato'o protestu forte kontra dezlokasaun ema Judeu sira sai husi rai-Olanda.

Antes ninia ezkusaun, Titus reza katak Maromak sei ajuda enfermeira ida-ne'ebé fo injesaun ba nia atu arrepende ninia asaun durante iha akampamentu. Nia mós fo enfermeira ne'e ninia rosario, maske enfermeira protesta hodi dehan nia ema Katóliku ne'ebé la reza ona. Hafoin tinan balu, feto ne'e ba iha komunidade Carmelita ida hodi husu perdua. Nia sai mós sasin ba prosesu Titus nia beatifikasiun, ne'ebé hala'o iha Roma iha loron 3 Novemburu 1985.



## Reza iha imajen Kristu nia oin

Jezus, bainhira ha'u hateke ba O  
Ne'ebé moris mai dala ida tan, ha'u hadomi O  
No o-nia fuan mós hadomi ha'u  
Nu'udar o-nia maluk espesial.

Maske bolu ha'u atu sofre tan  
Mai ha'u, sofrementu ne'e hotu di'ak,  
Tanba liuhusi dalan ne'e ha'u hanesan ho O  
No ne'e mak dalan ba O-Nia Reinu.

Ha'u haksolok iha ha'u-nia sofrementu  
Tanba ha'u hatene ne'e la'os tristeza  
Maibé dalan ne'ebe hili ba ha'u  
Dalan ida ne'ebe lori ha'u hamutuk ho O, Na'i Maromak.

Husik ha'u mesak nonok iha ne'e,  
Iha ambiente malirin  
No husik ema seluk labele mai hamutuk ho ha'u  
Iha ne'e mesak, ha'u sei la kole.

Tanba O, Na'i Jezus, mak hamutuk ho ha'u  
Ha'u nunka besik O hanesan agora ne'e.  
Hela nafatin ho ha'u, ho ha'u, Jezus doben,  
O-nia prezensa halo buat hotu di'ak mai ha'u.

Hakerek husi Titus Brandsma iha  
12-13 Feveiru 1942 bainhira iha prizaun iha Scheveningen.

Original English Translation: Susan Verkerk-Wheatley / Anne-Marie Bos  
© Titus Brandsma Instituut 2018



The Carmelites  
Australia & Timor-Leste  
PRAYER • COMMUNITY • SERVICE

For further information on Titus Brandsma please visit:  
[carmelites.org.au/titusbrandsma](http://carmelites.org.au/titusbrandsma)

@CarmelitesAET